

續
文
獻
通
考

卷
四
一
—
四
二

保
4
5266
70-12



門保
號 5266
卷 70-12

續文獻通考卷之四十一

皇明進士雲間王圻纂輯

國用考 賑恤

宋

高宗紹興三十一年成都府路旱詔降僧牒四百道充糴

本措置賑濟

孝宗乾道三年遣使賑兩浙江東饑 四年賑綿漢等州

饑尋以饒信及建寧府等州饑遣使賑濟降僧牒一百

道付建寧府戶部降米五千石賑衢州饑荆南府僧牒

二百道衢州一百道饒信米各三萬石雷州水賜十道

詔諸路運司行下所屬將災傷處各選清強官遍詣地

頭盡行檢放或不實不盡有虧公私被差官并所差不
當官司並重作行遣其被水甚處令監司守臣條具合
措置存卹事件聞奏 知温州趙與可以支常平錢五
百貫并係省錢五百貫賑給被災人戶自劾上曰國家
積常平米正爲此也可赦罪 五年詔去歲災傷州郡
流移人令常平司所在收恤賑給 九年楚州饑賜米
五千石賑之 是年賑饒州饑上因覽知州王秬賑濟
條畫言饑歲民多遺棄小兒命付諸路收養如錢物不
足可具奏來于內藏支降 八年四川水命賑之 九
年台州饑命賑之 時臣寮言訪聞今歲旱傷非特浙
東被害如江西諸州例皆闕雨禾稻不收而贛吉二州

尤甚江東之太平廣德淮西之無爲軍和州多是先被
水患繼之以旱自今民已艱食其間州郡或有諱言境
內災傷不即申陳致失檢放條限或有雖曾申聞措置
賑濟事件朝廷未與行下切念救荒之政譬如拯溺救
焚勢不可緩今欲從朝廷專委逐路官疾速巡歷災傷
去處如委係失收不曾檢放或檢放不實者仰將今年
苗米依合減分數權行倚閣令候來年秋熟帶納其有
和糴米斛拋降馬料及諸色科買並權與住罷一年應
合賑糴賑濟去處許提舉官與一路見管常平義倉米
通融撥借應副其有諸州已條畫到措置賑濟事件朝
廷速降指揮庶幾官吏便可奉行百姓早被實惠詔從

之 淳熙七年姚述堯進對今歲旱傷賑恤之政當務

寬大上曰國家儲蓄本備凶歲捐以予民朕所不惜

九年賑兩浙饒州饑 十年賑京師饑 十三年賑利

州路饑 十五年賑臨安府饑與諸州水災

寧宗慶元初趙汝勣知當塗時歲饑穀貴乃開倉散米萬

斛一邑獲全事聞詔他郡依汝勣賑恤法 五年以久

雨民多疾疫命臨安府賑恤之 六年建寧府徽嚴衢

婺饒信南劔州水常潤揚通泰和州江陰軍旱賑之

嘉泰元年詔賑被火貧民 是歲浙西江東兩淮利州

路旱賑之仍蠲其賦 四年命臨安府賑焚室 時葉

筠知南劔州州貧生子多不舉筠請立舉子倉賑給之

開禧二年發米賑濟貧民 嘉定元年詔臨安府賑

濟流民 是年又出米二十萬石賑江淮流民 二年

出內庫錢十萬緡為行在貧民棺槨費又賜行在諸軍

死者棺錢 八月出米十萬石賑兩淮流民 三年臨

安紹興府嚴衢州大水賑之 四年命臨安府賑給病

民賜棺錢 六年兩浙諸州大水賑之 七年出內帑

錢賑臨安府貧民 八年出米六萬石賑糶臨安府貧

民 七月又出米三十萬石賑糶江東饑民 十年詔

江東提舉司出米十萬石賑給貧民 十一年詔湖州

賑卹被水貧民 十五年詔江西提舉司賑卹旱傷州

縣 十二月詔出米五萬石賑臨安府貧民 十六年

續文獻通考卷之四十一
正月命淮東制置司賑濟山東流民 是年詔以米五萬二千五百石賑道州饑 九月詔江淮諸司賑恤被水貧民 十七年命臨安府賑糶貧民 四月詔廬州賑糶饑民 時知廣德軍耿秉田因歲歉發倉賑濟活饑民萬餘自劾矯制之罪上聞之賜璽書褒異 袁甫進區處流民故事曰臣竊爲區處流民之策惟富弼之法最爲簡要所謂簡要之策惟曰散處其民於下而總提其綱於上而已竊聞金陵諸邑流民羣聚皆來自淮西荷戈持刃白晝肆掠動輒殺傷沿江出兵驅之其在句容之境者輒入金壇若宣城若池陽若當塗所在蟻聚剽劫成風逃亡之卒皆入其黨江南姦民率多附和

目前勢已若此冬杪春初日月尚長蔓延不已各將潰裂四出不可收拾臣愚欲乞朝廷行下督府及諸閫與凡安撫總漕諸司作急措置自一路而推之諸路由諸路而推之諸郡每處流民隨所在分之凡贍養之費惟分則易供居止之地惟分則易足此非臣之臆說也弼擇所部五州勸民出粟得十五萬斛益以官廩隨所在貯之又擇公私廬舍十餘萬區散處其人以便薪水粥之所作可謂委曲詳盡矣今日果能推行此策非但勸民出粟而已或撥上供之數或撥樁管之錢或乞科降則上下當相視如一家或請團給則彼此當聯絡爲一體而所謂團給者又不止一途而已能勞苦者庸其力

有伎藝者食其業其間有爲士者則散於庠序爲商者則使之資遷心有所繫而姦無所萌此皆分說也分之愈多則養之愈易而其要在督府制閫以及總漕諸司爲之領袖而已是故民貴乎分而權貴乎合所謂散處其民而總提其綱者正謂此也臣願朝廷使長吏任責一如青州故事流民幸甚宗社幸甚

理宗寶慶元年滁州大水詔撥會子三千緡米千六百石賑恤被災之家二年浙東大水汪綱發粟三萬八千餘緡錢五萬賑給之又蠲租六萬餘石疲瘠頓蘇越有經總制稅各四十二萬其中二十五則紹興以來虛額也前後帥懼負殿以修奉攢宮之資僞增綱據其實以

聞詔免九萬五千緡而宿弊因是著明 紹定二年五月詔成都潼州路旱歉令制置司及各路監司疾速措置賑恤務要實惠及民仍考察郡縣奉行勤惰以聞從臣寮請也 十月詔賑贍台州被水之民 三年以雪寒詔出封樁庫緡錢三十萬賑恤臨安貧乏之民 五年三月以陰雨詔出豐儲倉米五萬石以紓民食 是年臣寮奏戒飭諸道常平使者遵用淳熙詔令每歲覈州縣豐歉分數或災傷重處即與賑恤不許隱蔽不實違者罪之 六年八月詔令江淮制置大使司給米麥一百萬斛分撥三京歸附州縣委官置務賑濟 端平三年詔有司賑恤流民 是年紹州英德府大水詔令

本司多方措置賑恤 嘉熙元年詔淮襄避地流民饑寒可念令沿江諸郡委官賑濟 五月詔出內庫緡錢二十萬給被災之家 三年詔出封樁庫祠牒三百道下江東憲司賑饒信南康三郡旱傷之民 四年詔出封樁庫緡錢三十萬賑臨安府貧民 淳祐二年詔出封樁庫十七界楮幣十萬賑贍紹興處婺水滂之民 三年詔以雪寒出封樁庫十八界楮幣二十萬賑臨安府細民 七年詔監司守臣宜亟講荒政以賑乏絕稅租有合蠲放者覈實以聞 乾道五年初閩人生子貧者多不舉紹興中朱文公請立舉子倉淳祐中趙汝愚帥閩推廣其意括絕沒之田產召佃輸租仍發糶本建

倉收儲遇受孕五月以上者則書于籍逮免乳日人給米一石三斗至是詔賜常平錢米賑給之 是年詔賞福建路監司州郡所上官民之家濟糶者凡九人補轉官資有差 十年十二月詔江浙沿江郡縣刷其流民口數於朝廷樁管錢米內賑濟仍許於寺觀及空閒官舍居住 十一年十一月詔江東西湖南北福建二廣有災傷瘡癘去處雖已賑恤猶恐州縣奉行不虔可令監司守臣體認德意多方救拯詔隆冬疑寒出封樁庫十八界官會子二十萬貫賑之 十二年出封樁庫十八界楮四十萬賑行在軍民 七月上諭輔臣嚴州水勢可駭移撥之米當賑濟不當賑糶謝方叔奏衢婺台

亦多漂蕩宜一體救恤 是月以諸路水災遣使分郡賑恤 寶祐五年詔朕軫念軍民無異一體常令天下諸州建慈幼局平糶倉官藥局矣又給官錢付諸管置庫收息濟貧乏奈何郡守奉行不謹所惠失實朕甚憫焉更有斃於疫癘水災與夫歿於陣者遺體暴露又不忍聞也可行下各路清強監司嚴督諸守臣宣制安撫嚴督主兵官並要遵照元降指揮如慈幼則必使道路無啼饑之童平糶則必使小民無艱食之患官藥則劑料必真修合必精軍庫收息則以時支給不許稽違務要公平不許偏徇庶若民若軍皆蒙實惠 十一年正月詔賑荆南饑 景定二年十月詔物價未平出封樁

庫楮幣二十萬賑二衛諸軍出豐儲倉米五萬石賑都民 三年二月都省言臨安安吉嘉興屬縣水澇溺死頗衆詔各郡守臣給錢埋瘞 時馬光祖知榮王與芮府有積粟三往見之王以他辭光祖乃卧于客次王不得已見馬光祖厲聲曰天下誰不知儲君爲大王子今民饑欲死不以此時收人心乎王以廩虛辭光祖探懷中出片紙曰某庄某倉若干王語塞遂許以三十萬光祖遣吏分活饑民甚衆

度宗咸淳元年趙與檳知建德縣民以旱澇告請於朝得粟一萬斛以濟尋遷建德府暨解任以所積俸錢并堂饌直役錢預爲建德縣人戶代輸咸淳四年茶租其救

荒之政民尤被其惠

遼

太宗天顯五年七月賜平民布帛 會同二年二月詔賜
在京吏民物 三月大賚百姓

景帝寶寧八年三月遣五使廉問四方鰥寡孤獨貧乏失
職者賑之

聖宗統和元年九月以東京平州旱蝗詔賑之 八年四
月以歲旱諸郡艱食賑之 十一月以吐谷渾民饑賑
之 十五年二月勸品部富民出錢以贍貧民 四
發義倉粟賑南京諸縣民 十六年四月賑崇德宮所
隸州縣民之被水者 二十五年十二月賑饒州饑民

二十八年八月賑平州饑民 二十九年三月南京

平州水賑之 開泰元年十二月賑奉聖州饑民 二

年七月詔以敦睦宮子錢賑貧民 五年四月賑韶州

民 六年十月南京路饑輓雲應朔弘等粟賑之 七

年四月賑川饒二州饑又賑中京貧乏 八年楊佖賑

南京饑鬻子者贖之民大悅 太平六年二月南京水

遣使賑之

興宗景福元年賑薊州黃龍府饑民 十五年十一月賑

南京貧民

道宗咸雍二年七月以歲旱賑山後貧民 清寧初耶律

獨攬以東路饑奏賑之 四月賑西京應州朔州饑民

七年十一月賑饒州饑民 八年歲饑賑思蔚順惠
 義惠饒易中京及中興等州饑民 太康元年正月賑
 雲州饑 二月祥州火遣使恤災 四月賑平州平灤
 南京貧民 九月以南京饑免租仍出錢粟賑之 二
 年正月賑黃龍府饑 四年正月賑東京饑 五年十
 月賑平州貧民 七年十一月詔歲出官錢賑諸宮分
 及邊戍貧民 太安二年正月賑遼州上京中京乾顯
 成懿等州貧民 三年正月出錢粟賑南京貧民 二
 月發粟賑中京饑 四月賜中京隈烏右部貧民帛詔
 出戶部司粟賑諸路流民及義州之饑 七月出雜帛
 賜興聖宮貧民 四年賑上京及平錦來三州饑 又

賑蘇吉復涿鉄慶和春等州貧民 七年二月詔給渭
 州貧民耕牛布絹 八年十月賑西北路饑 十一月
 以通州潦水害稼遣使賑之 九年賑西北路貧民
 十年閏四月賜西北路貧民錢 壽隆元年正月賑奉
 聖州貧民 三月賜東北路貧民絹 二年二月賑達
 麻里別古部賜左右二皮室貧民錢 四月賑西地邊
 軍 三年二月南京水遣使賑之 五年賑遼州南北
 二紉 六年二月出絹賜五院貧民
 天祚帝乾統三年正月賜貧民錢 四年十一月御迎月
 樓賜貧民錢 六年二月出絹賜五院貧民

金

金祖收國七年正月詔前後起遷之民有懷土之心可令
所在有司深加存恤衣食不足者官賑貸之

太宗天會元年九月發春州粟賑降人之徙上京者
二年二月詔給宗翰馬七百匹田種千石米七千石以賑
新附之民 四月賑上京路西北路降者及新徙嶺東
之人 十月詔發上京路降者州民被秋潦者 又詔
有司運米五萬石于廣陵以給南京渤海戍卒 十一
月詔以米五萬石給棧懶實右廼 九年四月賑戍邊
戶與邊軍資糧不繼者 十年二月賑上京戍邊猛安
民 四月聞鴨綠江暴漲命賑徙戍邊戶在混同江者
七月賑太平路戍邊戶 十一年二月元帥府言承

宣差所至安撫賑濟復遣右三部司正范文淵前往視
之 七月勅尚書省曰饑民如至遼東恐難遽得食必
有餓死者其令散糧官問其所欲是止給以文書命隨
處官長計口分散令富者出粟養之限以兩月其粟充
秋稅之數 四年賑河北諸路及河州饑 十二月令
大興府于暖湯院日給米五石以贍貧者 承安二年
十月大雪以米千石賜普濟院令爲粥以食貧民 四
年十月陝西軍戶戰死者給糧贍其家 五年三月命
給米諸寺自十月十五日至次年十五日作粥以食貧
民 十月勅京府州縣設普濟院每歲十月至明年四
月設粥以食貧民 大安元年十二月詔平陽地震貧

民死者給葬錢五千傷者三千二年六月大旱下詔罪已賑貧民缺食者崇寧元年十月賑河東南路南京路陝西東路山東西路衛州旱災時福僧克遼東宣諭副使歲大饑出沿海倉粟先賑其民而後奏至寧元年正月賑河東陝西饑貞祐二年正月知大興府事胥鼎以在京窮民缺食者衆宜設法以救乃奏京師官民有能贍給貧人者宜計所贍遷官以獎勸之遂定權宜贍恤例格如進官陞職丁憂人許志舉求仕官監戶從良之類入草粟各有數全活甚衆興定二年正月詔議恤賑天下窮民十二月諭有司以京師丐食死于祁寒者可憫其給以後苑竹木令居獲燠所

三年十月命有司葺閒舍給薪米以濟貧民明年二月罷俟時平則贍之以為常五年閏十二月發上林署粟賑貧民

哀宗正大四年遣使安撫陝西路以牛千頭賜貧民五年十二月以陝西大寒賜軍士柴炭銀有差京兆鳳翔府司竹監退竹令分給之七年八月賜陝西死事之孤塩引及絹仍量材任使天興元年三月置局養無家俘民

元

凡元賑恤之名有二曰蠲免者免其差稅即周官大司徒所謂薄征者也曰賑給者給以米粟即周官大司徒所

謂散利者也然蠲免有以恩免者有以災免者賑貸有以鰥寡孤獨而賑者有以水旱疫癘而賑者有以京師人物繁湊而每歲賑糶者其為制各不同

世祖中統七年首詔天下鰥寡孤獨廢疾不能自存之人所在官司以糧贍之 五年益都民饑驗口以賑 六年東平河間一十五處饑驗口賑之 至元元年又詔病者給藥貧者給糧 三年濟南饑以糧三千萬石賑之 七月以課銀一百五十錠濟甘州貧民 四年以錢糧幣帛賑東平濟南貧民鈔四千錠賑諸王只必帖木兒部貧民 九年勅以籍田所儲糧賑民不足又發近地官倉濟之 十年勅東京路運米二萬石賑高麗

御史臺臣言沒入

贖罰為鈔一千三百錠詔有貧乏

不能自存活者以沒入之贖賑之 是年賑米凡五十

四萬五千五百九十一石 十一年民饑發米七萬五千

四百一十五石粟四萬五千五百九十九石以賑之 十二

年賑米三千七百四十八石賑粟二萬四千二百六石

十三年東平濟南泰安德州連海清河平灤西京等

州皆以水旱缺食賑軍民站戶米二十二萬五千五百

六十石粟四萬七千七百七十二石鈔四千二百八十二

錠有奇 十四年十二月以大都物價翔踊發廩萬石

賑糶貧民 是歲賑東平濟南等郡饑民米二萬一千

六百七十石粟二萬八千六百十三石 十五年賑天

下饑民米八萬八百九十石粟三萬六千四十石鈔二萬四千八百八十錠有奇 至元中拜降爲慶元路治中歲大饑狀累上行省不報拜降曰民饑如是而不賑之焉在其爲民父母即躬詣行省力請得發粟四萬餘石民賴之全活者甚衆 十六年以江南漕運舊米賑軍民之饑者 十八年發鈔及金銀以給貧民 十九年江南民饑真定以南民多流移和禮霍孫請所在官司發廩以賑從之 二十一年建寧米價踊貴浙西官慰使史弼發米十萬石以平價糶之而後聞于省省臣欲增其價弼曰吾不可失信寧輟吾俸以足之省不能奪益出十萬石建民賴以不饑 二十二年賑糶京師

貧民命于京城各設三舖遣官吏發倉粟減其直以賑糶軍民凡白米每石減鈔五兩南粳米減三兩歲以爲常 二十五年中書省臣言杭蘇湖秀四州復大水請輟上供米二十萬石賑之帝是其言 二十七年以浙東諸郡河間路饑俱給九十日糧寧國等路大水民流移者四十五萬八千四百七十八戶凡賑粟五十八萬二千八百八十九石 二十八年杭州平江等五路溧陽太平徽州廣德州鎮江五路江南湖廣大都饑發粟賑之 三十年詔各處孤老凡遇寬恩人給布帛各一成宗元貞元年以江西饑命廉訪使官賑之 四月增京師兩城賑糶米肆上以京師米貴又廣世祖之制設三

十肆發米七萬餘石糶之其後每年增糶多至四十萬石 二年賑福建廣西江西道饑 大德元年六月以糧四千餘石賑廣西路饑民萬五千石賑江西被水之家 七月以米九千四百餘石賑寧海州饑 十月以揚州淮安路饑韶州南雄建德温州大水並賑之 十二月發廩賑淮東饑 三年發臨江路糧十萬石賑建康等處饑 二月以浙西嘉興江陰江東建康溧陽池州水旱並賑恤之 四年二月發粟十萬石賑湖北饑 二月以糧二萬石賑寧國太平 九月建康常州江陵饑民八十四萬九千六百餘人給糧二十二萬九千三百九十餘石以濟之 五年六月平江等十有四路

大水以糧二十萬石隨各處時值賑糶 七月以米八萬七千餘石賑被水災者以糧千石賑遼陽省大寧路 八月以粟三萬石賑平灤等處被災者 六年二月京師民乏食命省臺委官計口驗實以鈔十一萬七千一百餘錠賑之 六月湖嘉杭廣德饒太平婺州慶元紹興寧國等路饑賑糧二十五萬一千餘石 七年二月令河南省賑恤流民 五月以糧五萬五千石賑糶太原等路高唐等州饑以糧三十五萬四千石賑糶平江等十六路饑 六月以糧萬石賑糶武岡路饑浙西饑民一十四萬賑糧一月 七月以糧萬石賑糶常德路饑 九年三月以濟寧去歲傷稼常寧州饑賑恤之

四月遣使以鈔四千錠米二萬五千餘石賑大同路被災者以汴梁歸德安豐去歲被災潭郴州桂陽東平等路饑並賑恤之 五月寶慶路饑發粟五千石賑之

七月以米四千石賑西華澤州以糧五萬一千六百石賑羅澤柳等八郡 十年二月發陵州糧二千餘石賑禹州饑 三月以米萬石賑任城饑 七月以米七

萬七千八百石賑羅武昌興國黃州饑 八月以米七千餘石賑羅成都等縣 十月發米萬石賑江州饑 十一月以米二萬一千餘石賑揚州饑 十一年

武宗 七月以江浙湖廣江西屬郡以糧二萬八千石賑之江浙湖廣江西河南兩淮屬郡饑於鹽茶課鈔

內折粟遣官賑之 又詔富家能以私粟貸者量授以官 八月以江東郡縣饑遣官賑之江南饑以十道廉

訪使所儲贖罰鈔賑之東昌汴梁唐州延安潭沅歸澧興國襄陽杭州平江各路饑發粟賑之 十一月廬龍

灤河延安昌黎撫寧等縣饑給鈔千錠賑之杭州平江等處大饑發糧五十萬一千一百石賑之

武宗至大元年正月紹興台州慶元廣德建康鎮江六路饑戶四十六萬有奇戶月給米六斗 二月汝寧歸德饑給鈔萬錠賑之益都濟寧般陽濟南東平泰安大饑

遣使賑濟為鈔十萬二千二百三十七錠有奇糧一萬

九千三百四十八石淮安等處饑以兩浙鹽引十
 粟賑之 六月大都饑發官廩賑糶江浙行省饑
 五十三萬五千石鈔十五萬四千錠麵四萬斤又流民
 戶三十三萬九百五十有奇賑米五十三萬六千石鈔
 十九萬七千錠鹽折直為引五千益都饑以朱汪利津
 兩倉粟賑之河南山東饑以兩道沒入贖鈔賑之 七
 月濟寧水以鈔五千錠賑之真定滏兩發米一萬七百
 石賑之 十月大都饑以米十萬石賑糶中書省臣請
 以湖廣米十萬石貯于揚州江西江浙海漕三十萬石
 內分五萬石貯于朱汪利津二倉以濟山東饑從之
 閏十一月大都米貴發廩十萬石賑糶 二年御史臺

臣言今年山東大饑流民轉徙乞以本臺沒入贖鈔萬
 錠賑之制可 三年九月內郡饑詔尚書省如例賑恤
 上都民饑發粟萬石賑糶 十月山東徐邳等處水旱
 以御史臺沒入贖鈔四千餘錠賑之 四年仁宗已即位發
 京倉米賑糶 六月濟寧東平歸德高唐徐邳諸州河
 間陝西諸縣水旱賑之 七月江陵水太原河間真定
 順德彰德大名廣平等路德濮思通等州傷稼大寧等
 路隕霜勅有司賑恤 十一月勅置京城米舖四十所
 白平糶八百石以大賑貧民
 仁宗皇慶元年二月賑山東流民通瀋州饑賑糧二月
 七月濱州饑出利津倉米二萬石賑糶寧國路涇縣水

賑糧二月 延祐元年歸州并武昌饑發米賑糶漢陽
思州饑沅陵盧溪武清岳武岡常德道州及肇慶武昌
建德南康建康江州袁州建昌贛州杭州撫州安豐等
路大水發廩賑糶 是時伯魯為甘肅行省平章政事
米價騰湧陸輓一石費二百緡乃為經畫計所省至四
百餘萬緡自是諸倉盛溢歲饑則發粟賑之春缺種則
貸之于是兵食既足民食亦足 二年勅江南行臺駐
罰鈔賑恤饑民 二月晉寧宣德等處潭江沅建昌奉
元龍興吉安南康臨江袁州撫州江州建昌贛州南安
梅州辰州興國潭州岳州常德武昌等路南澧州等饑
發廩賑糶畿內澧州昌平香河寶坻潭州金州永州茶
陵等處各被水災出所貯米賑糶 三年三月命行臺
廉訪司以見貯賑鈔賑河南流民復發廩賑遼陽蓋州
及南澧州潭永保慶桂陽澧道沅等路饑 四年發廩
賑汴梁揚州河南淮安重慶順慶襄陽饑 五年三月
勅以江城屯田米賑淨州平地等處流民 四月遣官
分理各部流民給糧賑濟 五月給糧德慶鞏昌隴西
被災者 六年五月命京師諸司官吏運糧輸上都與
和賑濟蒙古流民 九月發粟賑濟寧東昌高唐德州
濟南益都般陽揚州等路饑 七年英宗即位
未改元 四月賑
大都淨州等處流民 五月汝寧霖雨傷禾麥發粟五
千石糶 八月發米十萬石賑糶京師貧民賑廣東

新州饑

至治元年正月以蘄水縣饑賑糧三月 二月發粟
十萬石賑糶汴梁歸德饑又以鈔二萬五千貫粟五萬
石賑河南安豐饑 三月賑寧國益都饑 四月江州
贛州臨江袁州建昌饑發粟四萬八千石賑之廣德路
旱發米九千石賑糶 五月賑益都膠州濮州南恩新
州饑 九月京師饑發粟十萬石減價糶之 二年正
月發米三十九萬五千石賑山東保定河南汴梁歸德
襄陽汝寧等處饑以米十萬石賑糶潮州饑 二月真
定遼陽延安等路饑賑糧一月京師饑發粟二十萬賑
糶河南陝西河間保定彰德路饑發粟賑之 六月廣

元路歸谷昭化二縣饑官市米賑之 七月廬州六安
縣饑命有司賑糧一月 三年禹城縣人邢著程進出
粟以賑饑民命有司旌其門 二月京師饑發粟二萬
石賑糶 三月平江路嘉定州饑發粟六萬石賑之
十一月秦定帝即位袁州路宜春縣鎮江路丹徒縣饑賑糶
米四萬九千石 十二月澧州歸州饑賑糶米二萬石
秦定帝秦定元年糶米二十萬石賑京師貧民集州臨洮
狄道冀寧石州離石寧鄉袁州龍慶延安吉安杭州大
都及甘肅河渠彰德汴梁等路順德等二十一郡饑皆
發粟賑之又建昌紹興廣東武昌信州泉州南安贛州
等路饑賑糶有差 二年肇慶等處饑賑糶有差又二

月保定路饑賑鈔四萬錠糧萬五千石雒州歸信諸縣
河溢被災者萬一千六百五十戶賑鈔三萬錠薊州寶
坻縣慶元路象山諸縣饑賑糧二月大都鳳翔寶慶衡
潭全諸路饑賑糶有差 四月以鎮江諸郡饑賑糧五
萬餘石隴西漢州秦州饑賑鈔三萬錠 五月平江等
十二郡饑賑糶米三十二萬五千餘石鞏昌臨洮饑賑
鈔五萬五千錠 六月濟寧等十二郡饑賑糶米七萬
餘石 七月梅饒鎮江邗諸路饑賑糶米二萬餘石
八月南恩州瓊州臨江府歸德路饑賑糧有差建昌衡
岳饑賑糧米一萬三千石 九月瓊州南安德慶諸路
饑賑糧鈔有差 十一月京師饑賑糶米四十萬石內
郡賑鈔十萬錠米五萬石河南諸郡流民就食通都二
州命有司有恤杭州路饑賑糧一月常德路饑賑糧一
萬一千六百石 十二月濟南延州饑賑鈔三千五百
錠惠州杭州饑賑糶有差 三年大都路歸德府屬縣
饑共賑糧十一萬六千石河間保定真定饑賑糧四月
建昌饑賑糶米三萬石 三月永平等路饑賑鈔六萬
六千餘錠寧夏等路饑賑糧二月 七月賑永平奉元
鈔七萬賑濠州饑民麥三萬九千餘石 八月杭州火
賑糧一月 十月京師饑發粟八十萬石減價糶之
十一月瀋陽遼陽大寧等路及金復州饑賑鈔五萬錠
廣寧路霖雨傷稼賑鈔三萬錠永平明州水賑糧五月

給死者鈔二十貫保定路饑賑米八萬一千五百石懷
慶路饑賑鈔四萬錠 四年正月遼陽諸郡饑賑鈔十
八萬錠 二月永平饑賑鈔三萬錠糧二月 三月大
寧廣平屬縣饑賑鈔二萬八千錠河南行省諸州縣及
建康屬縣饑賑糧有差 四月河南奉元及通順檀薊
諸郡縣饑賑糧有差 六月廬州路饑賑糧七萬九千
石 九月保定真定饑賑糧三萬石鈔萬五千錠建昌
贛州惠州諸郡饑賑米四萬四千石 十月大都路水
賑糧二十四萬九千石衛輝獲嘉等縣饑賑鈔六十錠
十月減價糶京倉米十萬石以賑貧民 十二月發
米三十萬賑京師饑 致和元年正月河間真定順德

諸路饑賑鈔萬一千錠三月普寧衛輝泰安州饑賑
四萬八千三百錠冀寧路平定州饑賑糶米三萬石
五月燕南山東東道及奉元大同河間河南濮州等處
饑賑鈔十四萬三千餘錠陝州屬縣饑賑糶米五千石
奉元延安饑賑鈔四千八百九十錠 天曆元年張思
明爲江浙行中書省左丞會陝西大饑中書撥江浙鹽
運司歲課十萬錠賑之吏白周歲所入已輸京師當發
四中書省思明日陝西饑民猶魚在涸轍往返踰月是
索之枯魚肆也其以下年未輸者如數與之有罪吾當
坐朝廷贓之

文宗天曆二年正月以鈔五萬錠賑陝西饑又賑大都路

涿州房山范陽等縣饑民糧二月又以糧一萬三千石
賑糶大同路 二月永平雲需貴赤衛饑賑糧有差又
大同饑賑糶糧萬三千石 四月陝西諸路饑民一百
二十三萬四千餘口諸縣流民又數十萬先是賑之不
足行省復請商賈入粟中塩納粟補官及發孟津食糧
萬石及河南漢中所貯官租以賑從之 又河南府路
饑食人肉事覺者五十一人饑死者一千九百五十人
饑者二萬七千四百餘人乞弛山林川澤之禁聽民採
食行入粟補官之令及括江淮僧道餘糧以賑從之
江浙行省言池州廣德寧國太平建康鎮常湖慶元諸
路及江陰州饑民六十餘萬戶當賑糧一十四萬三千

餘石從之 又大都興和順德大名彰德懷慶衛輝汴
梁中興諸路泰安高唐曹冠徐邳諸州饑民六十六萬
六千餘戶賑鈔九萬錠糧萬五千石大都宛平保定涿
州易州賑糧一月靖州賑糶糧九千一百石 五月陝
西行省言鳳翔豎豐樂八屯萬戶府軍民饑者共二十
萬餘人賑以官鈔萬五千錠 六月命中書集老臣議
賑荒之策時陝西河東燕南河北河南諸路流民十萬
死亡相半命所在州縣官以便宜賑之 至順元年以
江浙大水民饑詔行省以入粟補官鈔三千錠及勸出
粟十萬石賑之是歲被災者多尤加賑恤 二年別兒
怯不花爲江浙行省左丞相行至淮東聞杭州大火揮

涕曰是吾不德累杭人也疾馳赴鎮即下令錄被災者六萬三千餘戶戶給鈔二錠焚死者亦如之人給月米三斗幼稚給其半又請減酒課錢千二百五十緡織紡減原額之半漆稅權停一年事聞朝廷從之又浙西諸路比年水旱饑民八十五萬餘戶中書省臣請令官私儒學寺觀諸田佃民從其主假貸鈔穀自賑餘則勸分富家及入粟補官仍益以本省鈔十萬錠并給僧道度牒一萬道從之湖州安吉太湖溢漂民居二千八百九十戶溺死一百五十七人命江浙行省賑恤之三年正月賑糶京師貧民米五萬石五月復如之是歲賑恤被災者如二年

順帝元統元年以江浙大旱發義倉糶募富人入粟以賑之二年杭州鎮江常州嘉興松江江陰水旱疾疫勅有司發義倉糧賑之共五十七萬二千戶五月中書省臣言江浙大饑以戶計者五十九萬五百六十四請發米陸萬七百石鈔二千八百錠及募富人出粟發常平義倉賑之并存海運糧七十八萬三百七十石以備不虞詔從之八月南康路諸縣饑以米十二萬二千石賑糶之至元元年沅州等處饑賑米二萬七千七百石是年江西饑賑糶米七萬七千石二年台州路及松江上海饑各發義倉募富人出粟賑之湖廣沅州江西撫州等路饑各發米賑糶是年江州諸縣饑總管

三大中貸富人粟以賑貧民而免富人雜徭以為息約年豐還之三年大都南北兩城設賑糶米舖二十處又賑各處民饑者四年賑京師河南北被水災者又賑耀龍與南昌臨沂等處饑民五年各處被災者多賑恤亦廣六年正月邳州饑賑米二月二月增設京城米舖從便賑糶福寧州大水京畿五州十一縣水災每人戶賑米二月三月山陽邢臺縣饑賑鈔五千五百錠至正元年正月湖南諸路饑賑糶米十八萬九千七十六石二月濟南濱州沾化等縣饑賑鈔三千錠河間莫滄等處饑陽阜平安喜靈壽四縣饑共賑鈔五萬五千錠又大都寶城饑賑米兩月三月大

都路涿州范陽房山般陽路長山彰德路安陽等縣饑共賑鈔二萬九千錠四月彰德饑賑鈔五千錠六月揚州路崇明通泰等州海溢溺死千六百餘人賑鈔萬一千八百二十錠二年正月大同饑人相食運京師糧賑之又順寧保安廣平磁威州饑共賑鈔六萬錠二月安陽臨漳等縣及大名河間路饑共賑鈔八萬二千錠大同路渾源州饑賑鈔六萬二千錠糧二萬石三月冀寧路饑賑糶米三萬石順德平鄉縣衛輝路饑杭州火共賑鈔四萬錠八月冀寧又饑復賑糶米一萬五千石九月睢陽縣民饑賑糶米萬三千五百石三年二月新鄭高密二縣地震寶慶路饑判官文

殊奴以所受勅牒貸官糧萬石賑之 十二月膠州及屬邑高密地震河南等處民饑賑糶米十萬石 四年閏二月永平澧州等路饑賑之 八月山東霖雨民饑發倉賑之 十一月以各郡縣民饑不許抑配食鹽復令民入粟補官以備賑濟 十二月又賑東昌濟南般陽慶元撫州饑民 五年三月大都永平鞏昌興國安陸等處并桃溫萬戶府各翼八民饑賑之 四月汴梁濟南邠州瑞州等處民饑賑之募富戶出米五十石以上者旌以義士之號廬州張順興出米五百餘石賑饑旌其門 六年四月發米二十萬石賑糶貧民 七年發米二十萬石賑糶貧民 四月河東大旱民饑遣使

賑之 十二月晉寧東昌東平思州高唐等處民饑賑鈔十四萬錠米六萬石 八年平江松江水災給海運米十萬石賑之 是年山東大水北邊軍民饑賑之 十一年二月遣使賑南北被寇人民死者鈔五錠傷者三錠燬所居屋者一錠 十二年大名路開滑濬三州元城十一縣水旱蝗饑民七十一萬六千九百八十八口給鈔十萬錠賑之 十四年詔被災殘破之處令有司賑恤 十五年上都民饑賑糶米二萬石大同民饑出糧一萬石減價糶之

紅帖糧 成宗大德五年始行初賑糶糧多爲豪強嗜利之徒用計巧取弗能周及貧民於是令有司籍兩京

貧乏戶之數置半印號簿文帖各書其姓名口數逐月對帖以給大口三斗小口半之其價視賑糶之直三分常減其一與賑糶並行每年撥米總二十萬四千九百餘石閏月不與焉

皇明

國朝凡遇水旱災則蠲免租稅或遣官賑濟遇蝗蝻生發則委官打捕皆隨時與地而異其法凡各處田禾遇有水旱災傷所在官司踏勘明白具實奏聞

太祖祖訓凡天下承平四方有水旱等災驗國之所積於被災去處優免稅糧若豐稔之歲雖無災傷亦當驗國所積稍有附餘擇地瘠民貧處優免之特不爲常例

凡賑濟洪武十八年令災傷去處有司不奏許本處差宿連名申訴有司二十五年令山東災傷去處每戶給鈔五錠二十六年令天下有司凡遇歲饑先發倉廩賑貸然後具奏二十七年定災傷去處散糧則例大口六斗小口三斗五歲以下不與

成祖永樂二年定蘇松等府水滄去處給米則例每大口米一斗六歲至十四歲六升五歲以下不與每戶有大口十口以上者止與一石其不係全災內有缺食者原定借米則例一口借米一斗二口至五口二斗六口至八口三斗九口至十口以上者四斗候秋成抵斗還官六年令福建瘟疫死絕人戶遺下老幼婦女兒男有

司驗口給米稅鹽糧米各項暫且停徵待成丁之日自行立戶當差八年令被災去處人民典賣子女者官爲給鈔贖還二十二年令各處災傷按察司與巡按御史委官會同踏勘

宣宗宣德元年六月巡按湖廣御史朱鑑言洪武間各府州縣皆置東西南北四倉以貯官穀多者萬餘石少者四五千石倉設富民守之遇有水旱饑饉以貸貧民今各處有司以爲不急之務倉廩廢弛贖穀罰金掩爲已有深負朝廷仁民之意乞令府州縣修倉廩謹儲積給貸以時仍令布按二司巡按御史巡察違者罪之上諭戶部曰此祖宗良法意比由守令不得人遂致廢弛爾戶部亦豈能無過其如御史言違者從按察司監察御史劾奏八月巡撫侍郎周忱奏置蘇松等府濟農水次等倉以備賑恤

英宗正統五年令各衛所屯軍有因水旱子粒無收缺食者照缺食民人事例賑濟候秋成還官七年令各府州縣一應贓罰入官之物俱于年終變賣在官候秋成糴糧預備賑濟九年令揚州府江潮泛漲滄死人民量給鈔收瘞

景皇帝景泰四年山東河南江北直隸徐州等處災傷令所在問刑衙門責有力囚犯於缺糧州縣倉納米賑濟雜犯死罪六十石流徒三年四十石徒二年半三十五

石徒二年三十石徒一年半二十五石徒一年二十石
杖罪每一十一石答罪每一十五斗

憲宗成化二年奏准今後若有侵欺賑濟銀糧或將官銀
假以煎銷均散爲名却插和銅鉛給與貧民者一體解
京發落 六年 勅差堂上官二員往順天河間永平
真定保定等府災傷地方設法招撫賑濟如本處倉糧
缺乏許於附近通州天津涿州保定等處倉分量給及
搬運接濟其一應差徭俱暫優免 又奏准將京通二
倉糧米發糶五十萬石每秬米收銀六錢粟米五錢以
殺京城米價又將文武官吏俸糧預支三月 十二年
令各處巡按御史按察司官踏勘災傷係民田者會同
布政司官係軍田者會同都司官

孝宗弘治二年議准順天河間永平等府水災滄死人口
之家量給米二石漂流房屋頭畜之家給與米一石
十一年令災傷處所及時委官踏勘夏災不得過六月
終秋災不得過九月終若所司報不及時風憲官徇情
市恩勘有不實聽本部參究 三年五月定預備倉糧
州縣每十里以上積糧一萬五千石州縣官考滿稽其
備荒積穀多少以爲殿最 十四年令徐淮二倉各撥
米三萬石臨清倉撥四萬石分派附近被災處所賑濟
十七年議准蘇松災傷起運不前暫將一年在京各
衙門官員月糧米每石折銀八錢該在南京本色祿俸

每石照舊折銀七錢其南京各衙門官員俸糧每月除米一石折銀八錢其餘并南京各衛倉糧俱每石折銀七錢漕運糧米折銀二十萬石每石兌運七錢改兌六錢各解交納

世宗嘉靖元年 命出太倉銀二十萬運赴陝西蝗旱地方給賑 二年南北二京及山東河南湖廣江西俱旱災戶部孫交請留蘇松折兌銀粳白米兩浙鹽價許墾開鈔課應天缺官薪皂贖緩蕪賑又請發太倉銀二十萬折漕米九十萬往賑從之 是年令將嘉靖三年分淨樂宮庫藏查盤節年所積香錢暫支二千兩賑濟湖廣地方旱災 五年奏准湖廣地方災傷將合屬各預

備倉原積穀米雜糧八十二萬石銀四萬兩并太和山嘉靖四五年分香錢見在實數十分內摘取六分酌量輕重賑濟 是年令鳳陽等處被災州縣稅糧照例除免應解物料暫且停徵兩廣鹽價留四萬兩接濟應用 六年奏准貴州災傷凡遇軍職犯該立功罪名者每一年納米十石令在衛閒住年限滿日許帶俸差操納過糧米存留備賑豐年停止 七年奏准北直隸八府災傷將本年分夏稅不分起運存留盡數蠲免其秋糧視被災分数照舊例行 又奏准河南災荒將所屬庫貯各項錢糧動支及留改折兌軍米十萬石賑濟被災府分饑民 又諭巡撫督令司府州縣將極貧人戶先

續文獻通考卷之四十一
二十九
范
儘見在倉糧為給賑若有不敷將各項官銀給發災輕
去處照例徵免輸納其充軍起運不可缺者將兩淮等
運司鹽價及各處別項徵納酌量派補運納如有不敷
仍將太倉官銀動支百餘萬兩派發送去以備代補起
運及賑濟二項支用八年令撫按曉諭積糧之家量
其所積多寡以禮勸借若有仗義出穀二十石銀二十
兩者給與冠帶三十石三十兩者授正九品散官四十
石四十兩者正八品五十石五十兩者正七品俱免雜
泛差役出至五百石五百兩者除給與冠帶外有司仍
於本家豎立坊牌以彰尚義又題准災傷地方軍民
人等有能收養小兒者每名日給米一升埋屍一軀者
者給銀四分隣近州縣不得閉糶又題准各災傷地
方守巡官查審流民大口給穀二三斗小口一二斗令
各速還原籍九年令各處運司將在庫無礙官銀及
贖罰銀兩趁時收買米穀別倉收貯委官守掌如遇饑
饉運司將極貧灶丁查照有司賑濟事例呈巡鹽御史
動支若有不敷各該有司查明與民一體賑濟十年
令支太倉銀三十萬兩賑濟陝西又奏准陝西災傷
重大令各州縣戒諭富室將所積粟麥照依時價糶與
饑民若每石減價一錢至五百石以上者給與冠帶一
千石以上表為義門被災人民逃出外境者招集復業
倍與賑濟銀兩官給牛種隆冬時月饑民有年七十以

上者添給布一疋動支官銀收買遺棄子女州縣設法收養若民家有能自收養至二十口以上者給與冠帶州縣各於養濟院支預備倉糧設一粥廠就食者朝暮各一次至麥熟而止 十一年題准凡遇賑濟除各衛所上班官軍自有應得月糧外其原無糧餉軍餘或父母妻子極貧者與饑民一體給放 十四年令將太和山嘉靖十年以前香錢并均州貯庫銀二千六百餘兩盡數發湖廣布政司賑濟并補給祿糧月俸支用今後香錢除正用外果有羨餘歲歲儲積以備凶荒賑濟 十六年題准今後凡遇地方夏秋災傷遵照勘災條例定擬成災應免分數先儘存留次及起運其起運不敷

之數聽撫按將各司府州縣官庫銀兩錢帛等項通融處補及聽折納輕齋存留不足之數從宜區處不許徵迫小民有孤實惠 二十年吉囊寇山西 上命部臣給賑被虜郡縣 二十三年題准各處災傷漕運正改兌糧米四百萬石除原額折銀并薊州天津倉本色照舊外其餘本色以十分為率七分照舊徵運糧米三分折徵價銀每正兌米一石連蓆耗共徵銀七錢改兌米一石連蓆耗共徵銀六錢 二十九年令進京避虜貧難人口每各給蓆一領按日給米一升 三十一年令大同全災衛所預放官軍月糧兩月仍以該鎮煤稅鹽稅等銀及預備倉糧賑濟 是年秋又以黃河滄沒安

東縣治令該縣應派改兌折銀移派該府別州縣該縣
止派支運 三十二年奏准河南災盜地方量行折徵
兌改米五萬石于臨清倉支運三萬石德州倉支運二
萬石以補漕運之數 是年秋又議准徐淮水災減免
有田有戶之人應納稅糧五萬石其見在淮徐兩倉米
麥專給與無田無戶之人或不敷將淮徐附近府州縣
該起運兌改及各處見運到淮漕糧內照數截撥補給
又令發京通二倉揆陳稷粟米各一萬五千石賑濟河
間保定水災 又以河南寇災令發預備倉糧及事例
民兵等銀給賑仍從臨清倉動支漕運糧米三萬石裝
至衛輝府酌發被災各州縣收頓候明春青黃不接散
賑 又令勸諭殷實舖行給領官銀或不敷聽於臨清
倉折糧銀借支二萬兩作為糴本前往鄰近有收地方
收買糧米聽賑仍立為均糶之法照依原買腳價聽從
過得人戶易買自濟或互為買遷相兼接續賑糶 三
十三年題准淮鳳災傷將未完改兌糧待麥熟後止徵
本色 三十八年令發太倉銀六萬兩賑薊遼饑荒另
發銀五萬兩以給牛種 又令將新運停泊天津應派
通倉漕糧撥八萬石運山海關令山海以東應賑人戶
自來搬運其廣寧遼陽金復海蓋隔遠處於真保地方
易買贏頭就令遼陽見調薊州防秋步軍回日順帶馱
運備賑 四十三年議准淮揚徐州災傷改折嘉靖四

十四年應運四十三年分兌運改兌秋糧淮安所屬邳州海州鹽城山陽睢寧五州縣各准三分安東贛榆沐陽宿遷桃源清河六縣及徐州所屬蕭縣各准五分徐州并碭山沛縣豐縣及揚州府所屬興化縣各准六分徵銀解部備放官軍折色支用 四十五年春正月賑畿內饑民在京者出太倉粟計口給濟在外行撫按就近給賑無致饑死

穆宗隆慶元年六月以霖雨壞民廬舍令五城御史以房號錢巡按御史以贓罰銀分賑之貧者每戶給銀五錢次三錢仍諭都察院左都御史王廷等督御史嚴加稽察使貧民得沾實惠直隸巡按王友賢奏被虜地方宜加賑恤而昌黎樂亭撫寧盧龍諸處請特免糧差以甦之報可 二年五月禮科何起鳴奏陝西西安郡縣地震經月壓傷人民乞賜賑恤上曰地震重大所在被災人民朕深憫念賑濟一事戶部議處以聞于是戶部奏以本省織造羨餘銀八千八百三十兩并預備倉糧相兼賑濟得旨撫按官須委用得人給散有去俾小民得霑實惠 七月以河間廣平保定真定順德大名等府災傷令有司查勘分數賑給有差戶科劉繼文言有司衛所積穀備賑今怠於奉行而撫按疎于督責災傷日奏無益貧民乞勅撫按嚴覈有司軍衛奏報所積數目以俟稽查及將貯庫贓罰無礙官銀

賈文獻通考卷之四十一

糴穀備賑 詔從之 壬辰 詔戶部發太倉銀二萬兩遣於災重處亟行賑濟務使民霑實惠其餘被災地方行各該撫按官一體設法賑恤仍查災傷分数酌量蠲免以副 朕軫念元元之意 三年八月以北直隸山西地方災傷 詔留贓罰銀兩賑給 東鹿縣大水壞廬舍溺死人民甚衆巡按房楠請發帑銀賑恤又乞將夏秋二稅食鹽絲絹及徭役等銀悉行停免 上用戶部議許動支隆慶三年分應解贓罰銀兩其蠲免錢糧行撫按酌議以蘇松二府水災給賑有差 丁卯戶科劉繼文以浙直山東災傷請量發帑銀遣官分賑仍留淮浙鹽魚及發臨德二倉粟米或令司府以開納銀

兩糴穀預備其漕運等糧并備用馬匹各照被災分数量准折徵俾小民得沾實惠禮部黃才敏亦請發德州倉見積米二三萬石以賑饑民令撫按扣贓罰銀兩抵補原額其他被災諸省如有倉儲皆如此例戶部覆奏如原議其起運存留等項錢糧應蠲免改折者候撫按酌議以聞報可 十月兩淮巡鹽御史李學詩以鹽場水災請扣留商人正鹽納銀每引一分挑河銀二萬兩賑恤竈丁從之 十二月湖廣撫按劉懋雷稽古等奏所屬府縣官積穀不如數者各奪俸貶秩有差 詔留兩淮鹽課銀二萬兩淮揚船銀三季以賑饑民 五年十月以江西南昌九江瑞州贛州南康饒州等府火災

命有司賑濟如例 六年五月以遼東鐵嶺等八城
火 命賑恤之

今上萬曆九年題准地方凡遇重大災傷州縣官親詣勘
明申呈撫按巡撫不待勘報速行奏聞巡按不必等候
部覆即將勘實分數作速具奏以憑覆請賑恤至於報
災之期在腹裏地方仍照舊例夏災限五月秋災限七
月內沿邊如寧甘固宣大山東薊密永昌遼東各地
方夏災改限七月內秋災改限十月內俱要依期從實
奏報或報時有災報後無災及報時災重報後災輕報
時災輕報後災重巡按疏內明白從實具奏不得執泥
巡撫原疏致災民不霑實惠 十二年陝西巡按奏義

婦王氏輸粟一千石賑饑 上命給銀堅坊旌表 是
年議准以後地方災傷撫按從實勘奏不論有田無田
之民通行議恤如有田者免其稅糧無糧免者免其丁
口鹽鈔務使貧富一體並蒙蠲恤 二十二年 上覽
給事中楊東明饑民圖 命部臣議可蠲可賑者以聞
戶部條上以銀十五萬賑河南以漕糧十萬賑鞏汝寧
等府又以漕糧十五萬平糶江北以米豆三萬六千賑
濟山東 上從之 福建道御史吳崇禮奏去歲霪雨
山東河南徐淮等處地方數千里橫罹水災夏麥秋穀
均無收穫交與河南徐淮接壤故其被災甚酷與徐淮
河南無異徐淮留米十五萬東充留銀米共約十餘萬

議者尤謂不足廼山東四府止留漕折銀二萬備倭米
豆三萬東省之災非減于徐淮河南也而賑之多寡懸
絕已甚頃者 皇上覽流民圖說從科臣楊東明之請
特發戶工二部錢糧 命寺臣鍾化民領 勅往河南
賑濟中州數十萬蒼赤固有更生之望矣然 皇上大
賚于中州而澤尚靳于東土豈謂東土之民流徙死亡
未至若中州甚歟臣昨由山東入京時目覩百姓流離
載道自南而北絡繹不絕憔悴稿枯不復似人形沿途
鬻妻賣子壯年之婦止易斗粟十歲之男僅易數錢棄
嬰孫于溝渠拋垂白于中路餓莩枕籍盜賊公行路人
相食一切不忍見之景象大都與東明所陳者相同自

古禍亂之興未有不始于失民心山東密邇畿甸爲第
一藩屏今雖饑餓切身然猶朝夕延頸以覬恩澤忍死
而不敢爲亂萬一人心渙散奸雄之徒乘隙鼓煽嘯聚
猖狂竊弄鋤挺于潢池中彼時豈能爲帑藏之乏置而
不問乎勢必議撫議勦無論所費不貲然驅良民而爲
盜陷赤子以入於刑 皇上愛民如子之本心恐亦大
有所弗忍者可不急救而豫防之乞亟發帑銀十萬及
時以賑山東庶嗷嗷待哺者不盡爲溝中之鬼而洶洶
不靖者亦可以消未萌之奸矣 兵科給事中張企程
奏中原饑饉異常山東淮揚有無礙官銀解部者乞令
使臣便宜給發章下戶部戶部奉民饑異常乞就近開

納以佐賑惠從之 三月 命遣使以 兩宮及 中
宮銀五萬五百兩賑濟河南徐淮山東諸處 二十六
年魏允貞題山西太原府災傷乞 賜賑恤 命加意
糴穀備賑毋得怠玩 二十七年四月撫臣李頤奏寶
坻三河縣災荒 命支各倉糧分投賑救 十一月巡
按崔邦亮奏河南災傷 上曰中土游罹災珍可憫免
徵改折等項依擬分別仍行該地方官多方賑救不許怠
緩坐視戶部覆奏上曰畿輔近地兵荒蝗湧相仍饑民
流離可憫食糧即准給散仍着有司加意拊循多方救
濟 二十九年戶部奏節序方嚴糶獨可憫自十一月
初一起至次年正月終止煮粥濟貧民 十月二十八

皇明進士雲間王圻纂輯

國用考 蠲貸

宋

高宗紹興三十年詔滁州上供錢依濠州盱眙軍例更展
 免一年時上優假淮民自休兵至今未嘗起稅 蠲淮
 東殘破州軍上供銀絹米麥經總制錢一年 三十二
 年孝宗受禪詔將來聖節諸路監司州軍應合進金銀
 錢絹等緣天中聖節已行進奉合進之數權與蠲免殿
 中侍御史張震奏四川有名無實之錢遞相積壓州縣
 各據本年分所收錢物具鈔赴總領所送納而總領所

即據其已前年分所欠之數批改鈔旁准作舊欠則舊欠雖足而新收仍欠恭觀登極赦文積年未納之錢截自紹興三十年以前並與除放甚大惠也應州縣納總領所鈔旁若已改批作三十年以前所欠並聽執元鈔作本年分改正豁除詔從之

孝宗乾道四年蠲廣德軍月棹錢 六年戶部狀已降指揮自行在至建康府沿路徵稅頗煩可省者省之今措置臨安府自北廓稅務至鎮江府沿路一帶稅場內地里接近收稅煩併去處合行省罷庶幾少寬商賈詔從之 詔江東運司將建康府太平州被水縣分四等五等人戶今年身丁錢並與放免一年不得巧作名色依舊科取如有違戾令監司按劾許人戶越訴 權盱眙

龔塗奏本軍去秋旱申告朝廷於高郵軍撥米二千石賑貸今二麥收成見准總所牒催還已一面告報人戶情愿具到收成熟田每畝送納課子小麥三升補助支遣詔特與除放 九年減紹興府嚴處州丁絹額 淳熙元年宰執進呈檢放過軋道九年災傷停閣錢物浙東路自淳熙元年爲始作三年帶納江東路候豐熟作兩年帶納江西路即不曾據州軍報到災傷數上曰旣是災傷若與停閣稅賦亦無從出可並與蠲免如有已納數目與理充一年合輸之數 是年詔江西湖南路累經災傷所有上供米斛逐年已行減放外今年雖是

豐熟尚慮民力未甦所有第四第五等人戶合納淳熙
元年秋苗特與蠲放一半如州縣輒敢違戾拘催許人
戶越訴及不得縱容吏人作弊將第三等以下人戶減
免今監司覺察按劾聞奏 二年宰執進呈江西湖南
昨得旨以頻年旱傷第四等第五等人戶合納秋苗特
蠲一半切恐者那支遣不足緣此敷擾及民上曰此是
特恩又所爭止七 直于上供數內除豁仍
禁戢不得輒有敷擾許人戶越訴將違戾官吏重治施
行 八年上宣諭輔臣曰朕緣久旱不雨曉夕思所以
寬恤無事不在念今且將諸路節次泛拋招軍並與蠲
免 十年戶部尚書王佐言經總制錢歲額一千五百

萬年來寢生奸弊或偶無收則便于帳內除豁而創生
窠名更不入帳分隸通年積壓直待赦放恐暗失經費
詔戶部將淳熙八年終以前拖欠內藏庫諸色窠名錢
物自淳熙九年終以前實欠並特與除放以後照常例
催納 十二年知婺州洪邁言本州淳熙八年旱歉支
降豐儲倉米五萬石賑糶內二千一百餘石係攬載船
盤剝折欠已納到六千餘貫外淨欠錢一千九百餘貫
約米五百三十餘石乞照紹興府體例蠲放從之 詔
浙東提舉具到淳熙十年旱傷紹興府會稽縣下戶借
貸官米四百三十餘石特蠲放 詔婺州蘭谿第四第
五等人戶淳熙八年內借過常平錢收買稻種見欠四

千九百六十餘貫可並蠲放 福建運司言本路財賦
全仰州軍運鹽息錢及趁賣產文契鹽丁米等物以爲
歲計內有掛欠于民有害皆當除放本司已行下所屬
權住催納竊慮州縣違戾復追乞賜蠲放從之 夔州
運判楊想言本路諸州自淳熙元年至十年終所欠轉
運司係省錢物皆言旱荒之後催科不行由是積欠欲
將所欠錢引一萬一千五百七十五道米麥三千二百
四十九石絹五百四十二疋並行放免從之 淮西常
平司言濠州乞除豁收糴不敷折欠米一千五百五萬
石有奇係救活餓莩特詔與除放 十四年江西運判
宋若水言照得本路旱傷江州興國軍爲重乞將第四
第五等人戶淳熙十二年十三年以前積欠苗稅并第
五等淳熙十四年見欠夏稅錢帛權與停閣候將來豐
熟逐旋帶納及將江州興國軍隆興府吉贛州臨江建
昌南安軍撫州安樂縣未解本司十一年十二年錢共
四萬六千七百一十餘貫米三千六百餘石並與免解
從之

光宗紹熙元年用尚書顏師魯等奏再減江浙諸郡月椿
錢十六萬五千緡有奇 五年減兩浙江東西路和買
折帛錢蠲兩浙路茶鹽身丁錢一年

寧宗慶元二年蠲臨安府民身丁錢減諸路和買折帛錢
三年 三年蠲紹興府明年身丁錢折帛綿絹 四年

再蠲臨安府民身丁錢三年 六年臨安紹興府民緣
攢宮役者蠲其賦 嘉泰元年復免臨安府民身丁錢
蠲臨安府通負酒錢六萬緡 七月蠲內外諸
軍戶身丁錢 登兩浙缺兩州縣逋租 八月蠲紹
興府攢宮所在民身丁錢 是月除靜江府折
帛錢 十二月再蠲臨安府民身丁錢三年 開禧元
年蠲臨安府通負酒稅錢十八萬緡有奇 八月蠲兩
浙缺兩州縣職當錢 三年詔湖北京西諸郡毋納今
年租稅民緣攢宮役者蠲其賦 嘉定二年蠲成都府
荒歉諸州民間逋負 五年詔諸路轉運司叅攷州縣
新舊歲稅籍蠲其橫徵之數 六年蠲荆湖諸州逋負

二十八萬緡有奇又蠲瓊州鹽錢 七年蠲福建沿海
諸州貧民納鹽 江東轉運副使真德秀奏乞停閣夏
稅蠲放秋苗疏曰臣聞乾德二年四月詔曰自春徂夏
時雨尚愆深恐黎民失于播殖所宜優卹俾獲蘇安一
應諸道所催今年夏租委所在官吏檢視民田無見苗
者上聞並與除放紹興二十八年八月二日詔令諸路
轉運疾速行下州縣開具實被災傷頃畝數目及合放
分數以聞仰惟太祖皇帝開造我朝配天之業高宗皇
帝中興萬世無疆之基二聖一心皆以保全民命爲本
故于災傷之歲切切如此夫以四月而蠲夏稅以八月
而檢秋苗自常情觀之毋乃太早蓋救災恤患當于民

未甚病之時若待其饑莩流離然後加惠則所全寡矣
爲民父母忍使至斯兩朝詔書可爲大法今臣所陳二
事如蒙聖慈降出三省早賜施行其於公私皆有便利
一則征歛旣寬逃亡必少所在田畝不至拋荒公家租
賦亦免失陷二則農人肯行播種自救其饑不致大段
缺食全仰官司糶濟三則窮窶之民粗有生理何苦輕
捐其身而爲盜賊未萌之禍銷弭尤多臣蒙聖恩畀以
漕計一路休戚之責實在臣庸敢齎沐投誠仰干天聽
八年三月蠲臨安府茶鹽營錢秋七月命兩淮諸州
毋納今年秋稅其極邊五州併明年夏稅悉蠲臨安紹
興府貧民夏稅及平江府五郡逋負米三千石有奇

九月詔江東監司覈州縣被水最甚者蠲其租 嘉定
中任良弼知休寧請蠲積欠二十萬緡詔從之又以休
寧諸鄉惟黎陽賦最重請依和睦鄉則例蠲減 十年
以久雨蠲茶鹽賞錢 十月復蠲三衙江上諸軍公私
逋負錢 十一年蠲四川關外諸州光州民兵戰死之
家稅役 十七年蠲台州逋負十萬緡有奇 嘉定時
袁甫補徽郡請蠲婺源紬絹萬七千餘疋茶租折帛錢
萬五千餘貫月椿錢六千餘貫

理宗寶慶元年二月蠲兩浙州軍屬縣官私僦錢有差
七月詔除韶紹興府每歲經總制虛額錢九萬五千五
百貫 二年以久雨屢蠲大理寺三衙臨安府酒所贖

賞錢自此至景定每歲屢蠲 三年二月詔蠲江西湖南福建被盜州縣租稅一年 又蠲紹興府餘杭上虞二縣民戶折麥一年以水災故也 紹定三年二月蠲福建被災州縣稅租一半 四年林棐知廣德奏蠲兩縣逋租一萬五千餘石代輸積欠十二萬貫 五年蠲磚瓦竹木蘆箔之徵三月 六年詔兩浙運司臨安嘉興府徽嚴安吉州竹木之徵再蠲三月時楊瑾攝華亭蠲民戶積欠 端平元年蠲興國軍秤人牙稅錢從守臣請也 嘉熙三年詔蠲端平三年民疇零租 四年以紹興府存饑詔蠲今年夏稅 淳祐七年五月詔賜兩淮京蜀曾經虜入之地田稅三年其宿逋悉除之

鎮江府旱詔兩浙轉運司檢覆蠲七萬四千石有奇 九年依京湖制置大使孟珙之請令淮東制置使李增伯蠲高郵軍及其屬邵州縣剝收牛租 時陳瓘奏蠲江東諸郡災傷發帑代三縣輸折絲綿錢五十萬九千三百六十餘貫 十年詔去歲嚴州水患田租其悉蠲之 十二年徐清叟奏水退之後貧民無以為生亦有自經溝瀆者聞帥臣陳昉發楮三十萬漕臣饒虎臣發楮五十萬米五千石以賑之乞與除豁使知聖旨上欣然從之其後蠲九都苗米凡二十二萬五千八百七十七石有奇 寶祐二年詔前蜀帥政事供狀兵苦於征戍民困于流離其蠲近邊州郡租賦三年 三年詔永

蠲紹興府和買絹 時年予才知太平州前政負上供
綱及總所綱七十萬緡悉為補之蠲黃池酒悉及三縣
秋苗夏稅畸零紬帛絲綿麩麥各以千萬計 五年詔
蠲諸路州縣民戶逋欠官賦上曰州郡所欠內帑項目
甚多年遠者悉與蠲放其合解者可下諸路隨正綱帶
納 景定元年三月都省言北兵所犯州縣其鄂州壽
昌軍已行蠲放租稅餘州縣當一體寬恤從之 又詔
全鄂永衡賓柳象瑞州興國軍南康軍建昌縣隆興府
奉新奉寧武寧靖安縣江州瑞昌德安縣臨江軍清江
新喻縣潭州醴陵瀏陽縣開慶元年以前二稅並蠲之
三年五月蠲臨安府稅三月平物價也 九月詔紹

興府昨因延燎令倉司給貸居民錢今經兩年民貧可
憫其悉蠲之 十月詔蠲四川制總州縣醴醕權利三
年以都省言循明禮前例也 又詔蠲諸路州縣折納
糧幣不許陽減陰取違坐紹興條例 四年十二月蠲
兩浙州軍及建康府見監駐賞茶鹽錢

遼

穆宗應曆三年十一月以南京水詔免今歲租
聖宗統和四年八月用室昉韓德讓言復山西今年租賦
以遭宋兵侵掠也 十月以南院大王留寧言復南院
部民今年租賦 七年三月詔免雲州逋賦 九年正
月詔免三京諸道租賦 十年二月免雲州租賦 十

二年正月駐蹕滿塊坂詔復行在五十里內租又蠲宜
州賦調 二月免南京被水戶租賦 十四年正月蠲
三京及諸州稅賦 十五年正月免流民稅 三月免
南京逋稅及義倉粟 十六年四月罷民輸官俸給自
內帑 十九年十二月免南京平州租稅

興宗重熙十一年十二月詔蠲豫備伐宋諸部租稅一年
十二年十一月以上京歲儉復其民租稅 十七年
八月復南京貧戶租稅

道宗咸雍四年永清武清安次固安新城歸義容城諸縣
水復蠲一歲租 七年十一月免南京流民租 八年
二月歲饑免武安州租稅 九年十一月詔行幸之地

免租一年 十年正月蠲平州復業民租賦 太康元
年九月南京饑免租稅一年 二年二月南京路饑免
租稅一年 九月以南京蝗免明年稅租 五年十一
月復南京流民差役三年被火之家免租稅一年 六
年五月免平州復業民租賦一年 十一月免西京流
民租稅一年 大安三年正月復南京貧民租賦 三
月免錦州及上京貧民租一年 四月免諸路貢輸之
半 四年正月免上京逋逃及平民租賦 四月免蘇
吉復淶缺五州貧民租稅 十月免百姓所貸官粟
十年四月除王田密雲流民租稅一年 十二月詔改
元免貧民租賦 壽隆五年十月免遼州租稅一年

六年十月以平州饑復其租稅一年
天祚帝九年十月詔免今年租稅

金

太祖爲詳穩時有貧民爲盜者歡都等欲殺之太祖曰以財殺人不可財者人所致也遂減盜賊徵償法爲徵三倍民間多逋負賣妻子不能償康宗與官屬會議太祖在外廷以帛繫杖端麾其頰曰今貧者不能自活賣妻子以償債骨肉之愛人心所同爲今三年勿徵過三年徐圖之衆皆聽令聞者感泣自是遠近之人歸心焉
太宗天會元年十二月蠲民間貸息詔咸州以南蘇復州以比年穀不登其應輸南京軍糧盡蠲免之 二年十

二月以東京比歲不登詔減田租市租之半

熙宗天眷五年十二月詔免民戶殘欠租稅 皇統三年

蠲民稅之未足者 海陵元貞三年十一月以山陵禮

成明年租稅並與免放

世宗大定二年三月免南京正隆丁夫貸役錢 三年以

歲歉詔免三年租稅又詔蠲除河南陝西山東北京以

東及北邊州郡爲元帥府所取常例賦稅 四年三月

以北京粟價踴貴詔免今年課稅 五月詔免北京歲

課段疋一年 五年正月令有司旱蝗水溢之處與免

租稅 六年十月詔免雄莫等州今年租又以河北山

東水免其租 九年二月以中都等路水免稅 十二

年正月以水旱免中都西京南京河北河東山東陝西
去年租稅 十三年謂寧長曰民間差科計所免已過
辛矣慮小民不能詳知吏緣爲奸仍舊徵取其今所在
揭榜諭之 十四年二月詔免去年被水旱百姓租稅
十六年正月詔免去年被水旱路租稅 十七年三
月詔免河北山東陝西河東西京遼東等十路去年被
旱蝗租稅 十八年正月免中都河北山東河南陝西
等路前年被災租稅 十九年二月免去年被水旱民
田租稅 秋中都西京河北山東河東陝西以水旱傷
民田十三萬七千七百餘頃詔蠲其稅 二十年三月
又詔免中都西京河北山東河東陝西路租稅以前歲

被災故也 二十一年三月上初聞薊平灤等州乏食
命有司發粟糶之貧不能糶者貸之有司以貧貧民恐
不能償止貸有戶籍者上至長春宮聞之更遣人閱實
賑貸以監察御史石抹元禮鄭達卿不能舉各笞四十
前所遣官各論罪 九月以中都水災免租 二十三
年正月春大水詔夾道三十里內被災之民與免今年
租稅仍給傭值 二十四年八月詔免上京今年市租
二十五年二月免會寧府今年租稅 二十六年軍
民地罹水旱災者二十一萬頃免稅凡四十九萬餘石
上曰今之稅考古行之但遇災傷常加蠲免 二十七
年六月免中都河北等路常被河決水災軍民租稅

十一月詔河水泛溢農民被災者與免差稅一年懷衛
孟鄭四州塞河勞役并免今差稅 二十九年正月時
宗配赦民租十之一河東南北路則量減之尚書省奏
兩路田多峻坂磽瘠者徃徃再歲一易若不以地等蠲
除則有不均遂勅以赦書特免一分外中田復減一分
下田減二分其諸懸欠係官等錢俱免

章宗明昌元年十二月免獵地今年稅 三年六月有司
言河州災傷民乏食而租稅有未輸詔免之 九月免
園場經過人戶今歲夏秋租稅之半 五年十二月免
被黃河水災今年秋稅 承安四年二月諭點檢司自
蒲河至長河及細河以東朕常所經行官為和買其地

今百姓耕之仍免其租稅 四月免被旱州縣夏稅
五年正月詔有司自太和三年郡縣三經行幸民常供
役者賜今年田租之半 太和六年八月免唐鄧潁蔡
宿泗六州租稅四分之一 八年免河南山東陝西等
六路今年夏稅河東河北大名等五路半之
衛紹王大安元年十二月詔平陽地震人戶三人死者免
稅二年二人及傷者免一年

宣宗貞祐三年十二月詔免逃戶租稅 四年三月免陝
西逃戶稅 興定元年十月上謂宰臣曰朕聞百姓流
亡逋賦皆配見戶人何以堪又添徵軍需錢太多亡者
詐肯復業其議并除之宰臣請命行部官閱實蠲貸已

代納者給以恩例或除他役或本戶雜徵四之一上命
亟行之 十二月免逃戶復業者差賦 二年二月免
中京嵩汝等州逋租十六萬石 四月御史中丞完顏
伯嘉奏亳州大水計當免租三十萬石而三司官不以
實報止免十萬詔命治三司官虛妄之罪 七月以河
南大水下詔免租勸種 三年正月免單丁民月輸軍
需錢 九月勅侯摯論三司行部官勸民種麥無種粒
者貸之 四年八月上諭宰相曰河南水災唐鄧尤甚
其被災州縣已除其稅餘順成之方止責正供和糴雜
徵並免自今歲九月始傳周歲桑皮故紙折輸流民佃
荒田者如上優免 五年八月命有司除逋戶負租毋

徵見戶 十一月詔蠲徐邳宿泗等州逋租官民有能
墾闢閒田除來年徵科歸德亳壽潁停闕逋戶租外仍
蠲三之一逋戶田廬有司募民承租禁其毀損以候來
復 十月詔比欲民多種麥令所在官貸易麥種聞實
不貸與而虛立案簿反收其數以補不足之租其遣使
究治 元光元年二月詔除延祐鄜邠丹葭綏德租稅
仍令有司償其給軍粟直 二年宰臣奏去歲正月京
師見糧纔六十餘萬石今三倍矣計國用頗足而民間
租稅徵之不絕恐貧民無所輸而逋亡也遂以中旨遍
諭止之

哀宗正大四年七月賜陝西路民今年租 八年四月全

免陝西路軍需錢一年旱災州縣差稅從實減貸

元

世祖中統二年免平陽太原軍站戶重科租稅 詔真定路官民所貸官錢貧不能償者免之 又詔免今年租稅 三年以軍興人民勞苦勅停公私逋負無徵又免西京絲銀稅二月東平嚴忠濟向爲民貸錢輸賦四十萬七千四百錠借用課程鈔本鹽課一萬五千餘兩勿徵 是歲以李壇言勅濟南官吏凡軍民公私逋負權閣毋徵 至元七年以東京饑免三年絲銀十之三 又以大名東平南京河南等路災減今年絲銀十之三 又減河南南京兩路差賦十之六 八年以四川民

力困斃勅免茶鹽等課稅 十年免隆興路權課三年

十二年免諸路軍雜賦京畿北京西京陝西等路今年歲絲銀 十三年免大都醫戶絲銀 十四年以江南平百姓疲于供軍免諸路今年歲所納絲銀 十五年濟南總管張宏以代輸民賦常貸阿里阿荅赤等銀五百五十錠不能償詔依律停徵 十六年免四川差稅 十七年永平水給鈔貸之 十八年免福州路今年稅二分 是年以前租稅並免徵 又以保定路清苑縣水平陽路松山縣旱高唐夏津武城等縣蝨害稼並免今年租計二萬六千八百四十石 十九年以興兵問罪海外天下供給煩重詔慰諭軍民應有逋欠錢糧及

官吏侵盜並權停罷 免鞏昌等處積年所欠田租稅
課 二十年免戍軍差稅大都平灤兩路今歲俸鈔
二十三年以涿易二州良鄉寶坻縣饑免今年租平灤
太原汴梁水旱爲災免民租三萬五千六百有奇 八
月勅平陽路歲比不登免貧民稅賦 二十四年免唐
元衛河西地元籍徭賦大都今歲銀俸鈔江南竹木柴
薪及岸例魚牙諸課北京今歲絲銀 二十五年因雨
雹河溢害稼除民租二萬二千八百石 二十六年免
災傷田租 二十七年免上都大都保定河間平灤今
歲銀俸鈔一萬一百八十錠在遼陽者千三百四十八
錠有奇 又免大都平灤保定河間自至元二十四年
至二十六年負租十三萬五百六十二石 二十八年
三月詔凡州縣田常被災者悉免其租不被災者免十
之五 十二月免江淮貧民至元十二年至二十六年
逋租三百萬石鈔一千一百五十錠絲綿九千四百餘
斤又以太原上都饑免逋租三萬八千五百石 二十
九年免京畿今歲公賦 三十一年以上世祖皇后裕
宗謚號免所在本年包銀俸鈔及內郡地稅江淮以南
夏稅之半 勅新置會同安定二縣免其田租二年
成宗元貞二年正月詔蠲兩都站戶和市 大德元年
免上都大都隆興差稅及上都酒課三年 二年詔以
水旱減郡縣田租十分之三 三年以岳鄂等處旱免

其酒課夏稅 四年詔頒寬令免上都大都隆興大德
五年絲銀稅糧附近秣馬之郡免稅糧十分之三其餘
免十分之一 五年各路被災重者免其差稅一年江
陵常德澧州旱免其門攤酒醋課 七年以浙西饑免
今年夏稅并各戶酒醋課 十二月詔內郡比歲不登
免其田租 九年二月免天下道士賦稅 大同路地
震是年租賦稅課徭役一切除免 又免江淮以南租
稅及佃種官田者均免十分之二 十一年武宗時免
未改元江浙酒醋門攤課一年

武宗至大元年以內郡江淮饑免今年常賦及夏稅江南
北水旱饑荒遣使賑恤差發官稅並行除免 七月又

詔免紹興慶元台州建康廣德田租 二年正月免江
淮夏稅又詔各處人民饑荒轉徙復業者一切逋欠並
行除免仍除差稅 九月三寶奴言冀寧大同保定真
定以五臺定寺所湏皆直取于民宜免今年租稅從之
三年十月癸未月以東平濟寧游饑免其民差稅之半下
戶悉免之 又遣使往諸路分揀逋負合徵者徵之合
免者免之 是年以上皇太后尊號免大都上都中都
至大三年秋稅其餘各處今歲被災人戶曾經體覆依
上蠲免至大二年以前民間負欠差稅課程並行蠲免
又濟寧東平等路饑免曾經賑恤諸戶今歲差稅其未
經賑恤者量減其半 四年仁宗未
改元閏正月以立皇太

子減免各路租稅有差免大都上都隆興差稅三年

仁宗皇慶元年免鞏昌河州等路常賦二分及大寧路今

歲鹽課 延祐二年以星變減免各路差稅有差四年

如之 五年免鞏昌等處經賑濟者差稅及懷孟河南

南陽等居民所輸陝西鹽課 六年三月免大都上都

興和大同今年租稅 七年英宗未改元以大同雲中豐勝

諸郡縣饑發粟萬三千石貸之以改元減天下租稅二

分包銀五分免大都上都興和三路差稅三年

英宗至治二年詔天下流民復業者免差稅三年

泰定帝泰定元年免廣州福建番戶差稅一年 二年除

江淮朔科包銀免被災地差稅一年 四年以衛輝獲

嘉饑蠲丁地稅

文宗天曆二年以衛輝路旱免蘇門歲輸米二千石 十

月詔民間拖欠官錢無可追徵者盡行蠲免 至順元

年陝西行臺言奉元鞏昌鳳翔等路以累歲饑不能具

五穀種請給鈔二萬錠俾分糶于他郡從之 三年四

月免四川行省境內今年租

順帝元統二年十月以上皇太后尊號免今年民租之半

至正元年以兩浙水災免歲辦餘鹽三萬引 又免

天下稅糧三分 二年詔免雲南明年差稅 三年十

月蠲民間田租五分 十四年詔被災破殘之處蠲稅

三年 十六年詔沿海州縣為盜所殘掠者免田租三

年 十七年五月詔天下免民今年稅糧之半 二十
七年九月以岳興遞南百姓供給煩重其真保河南陝
西山東冀寧等處除軍人自耕自食外與免民間今年
田租之半 至正間王良爲江西左右司員外郎安福
小吏誣民欺隱詭寄田租九千餘石初止八家後株連
五千家良到官首言是州之糧比元經理已增一千一
百餘石復有詭寄欺隱者乎行省用良言悉蠲之

皇明

太祖洪武元年令水旱去處不拘時限從實踏勘實災稅
糧即與蠲免

憲宗成化十九年奏准鳳陽等府被災秋田糧以十分爲
率減免三分其餘七分除存留外起運者照江南折銀
則例每石徵銀二錢五分送太倉銀庫另項收貯備邊
以後事體相類者俱照此例

孝宗弘治三年議准災傷應免糧草事例全災者免七分
九分者免六分八分者免五分七分者免四分六分者
免三分五分者免二分四分者免一分止於存留內除
豁不許將起運之數一槩混免若起運不足通融撥補
十七年議准蘇松災傷起運不前暫將一年在京各
衙門官員月糧米每石折銀八錢該在南京本色祿俸
每石照舊折銀七錢其南京各衙門官員俸糧每月除
米一石折銀八錢其餘并南京各衙倉糧俱每石折銀

七錢漕運糧米折銀二十萬石每石兌運七錢改兌六錢各解交納

世宗嘉靖元年 詔蠲舊逋仍免元年田租之半 五年令鳳陽等處被災州縣稅糧照例除免應解物料暫且停徵兩廣鹽價留四萬兩接濟應用 七年奏准北直隸八府災傷將本年分夏稅不分起運存留盡數蠲免其秋糧視被災分數仍照舊例行 十六年題准今後凡遇地方夏秋災傷遵照勘災體例定擬成災應免分數先儘存留次及起運其起運不敷之數聽撫按官將各司府州縣官庫銀兩錢帛等項通融處補及聽折納輕齎存留不足之數從宜區處不許徵迫小民有孤實

惠 二十三年題准各處災傷漕運正改兌糧米四百萬石除原額折銀并薊州天津倉本色照舊外其餘本色以十分為率七分照舊徵運糧米三分折徵價銀每正兌米一石連蒔耗共徵銀七錢改兌米一石連蒔耗共徵銀六錢 三十一年以黃河渰沒安東縣治令該縣應派改兌折銀移派該府別州縣該縣止派支運 三十二年奏准河南災傷地方量行折徵兌改米五萬石內於臨清倉支運三萬石德州倉支運二萬石以補漕運之數 三十三年題准淮鳳災傷將未完改兌糧待麥熟後止徵折色 四十三年議准淮揚徐州災傷改折 四十四年應運四十四年分兌運改兌秋糧准

安所屬邳州海州鹽城山陽睢寧五州縣各准三分安
東贛榆沐陽宿遷桃源清河六縣及徐州所屬蕭縣各
准五分徐州并碭山沛縣豐縣及揚州府所屬興化縣
各准六分徵銀解部備放官軍折色支用 四十五年
十二月壬子 穆宗即位 詔開天下軍民十分窮困
國用雖詘豈忍照常徵派遂有明年蠲折之令

穆宗隆慶元年漕運米特與改折十分之三其餘不分京
邊起存本折各特免十分之五該部各撫按官仍設法
稽查使沾實惠 二年三月以永平府昌黎撫寧二縣
及撫寧山海東勝三衛所被虜殘甚凡錢糧存留者悉
蠲除之起運者已奉 詔免十之五仍免五之三 四

月以虜患免徵直隸撫寧衛軍器料銀 五月山西巡
撫楊巍奏本省驛遞歲徵站糧銀三十四萬四百餘兩
除支用外尚存十萬餘兩請量蠲四分之一以示優恤
即以見存者抵數戶部以站銀之徵不關白本部疑有
濫派混冒之弊請查覈舊籍以待改正其餘銀以抵石
州被虜地方稅糧撫按官從實查數以聞 七月以巡
按譚啟言東南征賦繁重 詔蠲蘇松常鎮四府近年
移借工部料銀 直隸巡按張檟上言大名真定二府
計畝出糧以養馬而今復有馬地餘銀之徵蓋起於正
德間爲流賊之亂額外權立此名徵銀市馬其後遂因
而不革非經制也請悉蠲之 上命自嘉靖四十五年

以前悉從蠲免而下撫按官會勘餘地有無以聞又
以甘肅等處旱災命蠲屯糧并發銀賑濟有差三
年八月以江南江北各府災傷命查蘆洲課銀自嘉
靖二十一年至四十三年逋負者悉蠲之又以杭嘉
湖三府水災改折湖州漕糧六分杭嘉三分南京各衛
倉米一年每石六錢并免三府額徵本省兵餉及工部
黃麻等料又量留撫按贓罰以賑之九月以水災
詔南直隸太倉州崇明靖江嘉定溧陽吳江高淳六合
長洲丹徒等縣改折漕糧有差無漕糧者停徵租一半
十月以雹災免宣府前等衛所城堡延保定寧三州
縣屯糧有差又以水災免浙江臨海天台黃巖仙居

太平寧海上虞餘姚諸暨蕭山嵊縣山陰會稽鄞慈谿
奉化定海象山麗水青田龍泉縉雲松陽遂昌雲和等
縣存留錢糧紹興府南京倉糧俱改折六錢又以水
災免徵鳳陽淮安揚州三府及徐州鈇麻料價銀一年
又以水災免山東沂莒膠濱武定寧海平度濟寧東
平臨清曹濮德州武城館陶霑化利津費剡城益都壽
光諸城沂水高密昌邑蒲臺海豐安丘臨朐蒙陰博興
高苑即墨福山臨菑樂安昌樂日照青城魚臺蓬萊棲
霞招遠陽信鄒平新城淄川濟陽嶧鉅野定陶單嘉祥
曲阜汶上陽穀壽張鄆城泗水鄒范德平章丘長清肥
城齊河南河歷城長山臨邑平原滋陽東河曹滕寧陽

金鄉城武平陰夏津觀城掖萊陽文登黃縣各存留糧
臨清濟南安東三衛莒州所各屯糧災十分者改漕糧
十之五減臨德二倉米麥每石銀二錢災九分者止減
二倉米無二倉米者減邊糧如其數以水災免河南
開封等府所屬州縣及宣武等衛所屯糧仍改折漕糧
有差十一月以水災免真定保定大名順德廣平六
府州縣并各衛所屯糧有差東鹿大名二縣停帶徵糧
一年戶部覆御史王友賢奏請減廬鳳淮揚四府徐
滁和三州軍餉銀三萬一千二十八兩并免鳳陽府民
壯銀八千六十兩以各衛所軍地銀五千一百二十二
兩正陽關船料盱眙上磨稅等銀足軍餉十萬兩之
數淮陽商稅羨餘壽州芍隄塘租及他州縣存留銀通
行計筭倘有奇羨足充軍需將四府三州帶徵積遺銀
錢俱行停免從之又詔免應天等府今年蘆課之
半又以蘇州松江常州三府水災詔改折額解祿
米倉糧一年又以水災免薊州霸州涿州昌平州遵
化豐潤玉田武清東安永清保定香河大城固安房山
良鄉宛平大興文安灤寶坻懷柔等縣薊州鎮朔營州
右屯遵化中義中東勝右興州前屯興州左屯開平中
屯武清營州前屯涿鹿中左興州中屯等衛寬河所存
留屯糧各有差文安保定大城永清四縣災重者停帶
徵糧一年十二月從戶部覆御史傅寵奏詔免南

京水軍左虎賁左府軍鷹揚留守中金吾後虎賁右直隸建陽等衛冊江田糧三十五頃有奇以南京天策等衛所首報陞科新田糧二百五十五頃補之 又以水

災 命湖廣歸州公安縣等處河南鄧州泌陽縣等處稅糧俱以分數改徵折色有差 又以水災改折松江府華亭上海二縣漕糧十分之五存留蠲免亦如之

又以水傷 詔免淮安府徐州高郵州寶應縣歲徵追捕民壯軍餉銀三萬四千四百餘兩 四年正月 詔蠲嘉靖四十五年各處積欠馬價銀有差 二月以水

災免直隸廬州府屬霍山舒城六安三州縣秋糧有差 以河南水災免開封歸德彰德衛輝四府春季解馬每疋折銀二十四兩備賑 三月山西撫臣靳學顏奏

朔州頻年苦虜居民死傷者過半請將積逋稅糧蠲免仍并其人戶為六里以省徭賦 詔可 六月以旱災免山西太原平陽潞安三府澤遼沁三州嘉靖四十三

四年未完京邊稅糧一半 七月以旱災免四川龍安一府及蓬簡潼川綿漢巴劍等州樂羅江資陽金堂德陽漳明中江安岳江油奉節巫山雲陽內江新都新寧建

始太平通江南充西充梓潼儀隴蓬溪井研仁壽成都華陽閬中廣元昭化蒼溪南江鹽亭射洪南部營山資縣安縣等處稅糧有差 八月遼東撫按官奏被災屯

田乞視輕重每畝蠲稅五分以示寬恤報可 又以湖

廣黃州德安荊州岳州承天武昌諸郡縣旱災命蠲
今年糧稅有差其黃陂孝感公安石首華容景陵被災
最重者令起運南糧改折其半仍發贖罰銀及倉糧賑
之又以水災免直隸保定大名廣平真定河間秋糧
有差九月以宣府雨雹及水災改折各衛屯糧有差
十一月以水災詔免浙江湖州府武康歸安烏程
秋糧有差起兌漕糧暫派成熟鄰邑代運仍發倉米贖
銀賑之五年四月以直隸淮安府所屬州縣災傷
詔停徵積逋馬價詔暫免平虜衛四年額徵屯糧之
半三年以前積逋俟豐年帶徵以督撫諸臣王崇古等
言其極邊困敝也五月以霪雨免宣府鎮南山一帶

衛所屯糧有差七月以水雹免大同鎮陽和高山二
衛屯糧有差八月以水災免順天永平二府所屬州
縣并營州前屯永清等衛屯糧有差九月以水災免
徵湖廣鄖陽襄陽屬縣保康房南漳穀城襄陽宜城秋
糧有差御史王廷瞻以雨災言三宮勲減牧場子粒
新增銀兩及裕府莊田改乾清宮供用錢糧者宜賜
蠲恤上命如詔旨免十之五又以北直隸安州
新安等縣南直隸銅陵等縣水災詔許改折起運漕
糧及蠲免存留有差又以水災詔許改折湖廣武
昌漢陽荊州等府漕糧之半十月以水災命蠲南
京錦衣等衛所及直隸揚州等衛所屯糧有差又以

浙江安吉州孝豐縣歸安武康等縣水災 命改折南
京糙糧及蠲免存留糧有差 以徐淮等處災傷許改
折蠲免各項錢糧有差仍令有司賑濟如例 十一月
以災傷免寶坻文安等縣薊州營州等衛所存留糧有
差 六年五月以廣東用兵 詔免高雷廉惠湖五府
是年田租十之三

今上萬曆十二年議准以後地方災傷撫按從實勘奏不
論有田無田之民通行議恤如有田者免其稅糧無糧
免者免其丁口鹽鈔務使貧富一體並蒙蠲恤 二十
六年九月浙江水災戶部覆巡按方元彥巡撫劉元霖
奏准除天台仙居黃巖太平各被災三分不准免外

將被災十分海寧臨安遂安桐鄉嘉善崇德六縣准免
七分被災九分安吉州仁和錢塘富陽新城鄞縣慈谿
奉化定海武義湯溪十縣准免六分被災八分餘杭於
潛昌化秀水海鹽平湖歸安烏程象山金華蘭谿東陽
建德淳安桐廬分水十二縣准免五分被災七分長興
德清武康孝豐義烏永康浦江七縣准免四分被災六
分嘉興壽昌常山三縣准免三分被災五分龍游江山
臨海三縣准免二分被災四分寧海西山開化三縣准
免一分俱于本年存留糧內照數豁免其免過銀數仍
令各府州縣議處無礙官銀抵補其嚴衢二所屯糧照
災重例每石折銀三錢二十一年以前八府未完米折

鹽鈔等銀悉准蠲免 十一月戶部覆直隸巡按安文
壁題蕭縣等縣疊罹水旱災傷姑准停徵本色 二十
七年戶科李應策奏連年饑饉民不堪命 上曰今年
各省屢報災傷朕心怵惕留疏省覽見京師雨澤疏通
謂各處皆有收成今覽科疏不覺惻然心動便着該部
撫揭覆議應蠲應停應賑等項行各該撫按着實舉行
以示 朝廷德意 二十九年十一月戶部覆直隸巡
按何熊祥題蘇松水災異常乞將嘉定縣永折漕糧姑
准減折一年毋分正改每石折徵銀五錢以後仍照原
題起解被災十分江陰一縣被災九分以上太倉州吳
江崑山武進江陰宜興金壇七縣本年漕糧俱准改折
七分仍徵本色三分被災八分以上長洲吳縣常熟華
亭上海青浦無錫丹徒丹陽九縣俱准改折五分仍徵
本色五分其改折之數不分正改照例每石折銀五錢
連蓆板耗脚輕齋在內每同本色齊徵其改折項下運
軍月糧亦准扣數免編及查靖江縣被災雖止七分以
上姑念疲邑准將該年應解南京光祿寺白糧每石折
銀八錢四門倉糙米每石折銀六錢與別縣本色一同
徵解南京戶部其正徵帶徵金花銀兩等項已經差官
守催速令追完解進及南京各衛倉米已經題准改折
毋容別議奉 旨是

賑貸群議附

一議儲蓄。自大學生財有道之外，惟積穀可以備凶荒。賑饑愍而民不至於流移。如漢大司農中丞耿壽昌奏設常平倉以給北邊，省轉漕，賜爵關內侯。唐開成元年，戶部奏請公私田畝別納粟一升，添貯義倉，從之。又宋淳熙八年，浙東提舉朱熹言：「乾道四年間，建民艱食，熹請於府得常平米六百石，請本鄉士居朝奉郎劉如愚共任賑貸。夏受粟於倉，冬則加二計息以償。自後逐年歛散，或遇少歉，即蠲其息之半。大饑即盡蠲之。凡十四年，得息米，造成倉廩，及以元數六百石還府。見管米三千一百石，以爲社倉，不復收息。每石只收耗米三升，故一鄉四五十里內，雖遇凶年，人不缺食。請以是行於司

倉。我朝正統六年，置預備倉。民有饑窘，即時驗實賑濟。如遇豐年，仍依例支給官銀收糴備用。嘉靖六年，詔各撫按司道督責有司，照見行事例設法多積穀米，以備饑荒。仍做古平糶法，春放支以賑貧民，秋成抵斗還官，不取息。如見在米穀數少，各將貯庫銀并問過紙贖銀，趁秋成委的當官糶買。比時估量添二三文庶來者，輻輳易於收積。府以一萬石，州以四五千石，縣以二三千石爲率，明立簿籍稽查。如遇荒年，減價糶與貧民。按以上數條，實積儲良法。近來有司率以簡訟爲德政，而紙贖之入，縱不別費，亦無幾何。今做朱子社倉法，有司遇年豐時，查各集鎮鄉村，大處置一社倉，勸諭本處

得過鄉民輸借或三五石十石二十石不拘多少俱聽其願不許逼迫每倉以百爲率不及則以官錢買補之遇春間民缺食聽本處民借用登簿秋償每石加息穀三斗放收委之鄉約保正看守責之甲長鄉夫待三四年後所積息穀過其本者仍將原勸借穀石照數退還各主如不願領者以出穀多寡行賞或以尚義扁其門此正所謂以取於民者還以予民不費之惠莫過於此二議停蠲蓋歲值大侵公私俱病惟停蠲則民雖厄於無所入尤幸於無所出我朝永樂十九年詔自十七年以前各處逋欠稅糧程課鹽課馬草等項及十八年被水地稅糧悉與蠲免宣德八年兩直隸河南山東山西凡被災地方自七年以前逋欠夏秋糧戶口鹽糧及官軍屯糧子粒詔皆停徵其逋欠各項及今夏秋稅糧盡數蠲免嘉靖十六年被災地方應免錢糧已徵者准作本戶下年該納之數未徵者照例蠲免何者民間殷實戶間有積聚尚堪補一家食指并宗族親隣枵腹稱貸者惟常稅不蠲其素藏遺粒悉供輸納莫免鞭敲而貧民旣稱貸無實又征求不已富者不至于貧貧者不至于流亡不已也惟急議停蠲則爲仁政所當先者奈何二三有司或拘泥常限預期徵之或恐完數不及礙其遷轉停蠲之旨方下而稅糧數計已完賢者則議抵補下年不肖者扣入私囊竟使朝廷恩澤徒

爲紙上虛文民轉展溝壑宵聚爲盜咎將誰執凡遇水旱災傷有司速行踏勘申請奏聞速議停蠲庶聖澤不孤民沾實惠矣

三議賑濟粵稽漢文元鼎二年江南水潦遣博士等官循行告災所屬無令重困吏民有採賑饑民免其厄者具以名聞宋太平興國八年以粟四萬石賑同州饑咸平二年出粟十萬石賑兩浙貧民我朝嘉靖三十四年歲侵詔發內帑銀三萬兩賑濟饑民蓋賑濟所以調窮民無告者若稍得過之家雖遇大侵無收猶能稱貸富室或百計求活不至流亡惟無告窮民生借無路坐以待斃賑之期宜急賑之法宜均必須藉仁明掌印

官親自臨地清查臨倉調停給散不使有遺吏胥不致漁獵定期赴領隨給不得擔延等候萬一荒村遠域用舟車載至其地散之庶枵腹之民不致斃之倉下什之中途矣不然雖空竭倉廩而嗷嗷者卒未免爲溝中之瘠也惡在其爲民父母乎

四議撫恤宋天聖七年閏二月詔河北轉運司契丹流民其令分送唐鄧襄汝州以閒田處之仍令所過人給米二升初河北轉運司言契丹大饑民流過界河上謂輔臣曰雖境外之民皆朕之赤子可賑救之國朝洪武七年詔各處人民流移願歸或身死拋下老幼還者聽從其便鰥寡篤廢之人貧難存活者有司勘實官

給衣糧養贍宣德五年各處百姓因饑逃移者行布按
州郡招諭復業仍善加撫恤免其戶下稅糧雜差蓋民
以水旱災傷生活無計差稅無辦倘遇賢有司多方調
濟設法撫綏緩其賦役寬其逋負貸其種子靖其寇盜
葺其室廬尚堪存活不至流竄萬一他邑流移至我疆
界須念呻吟愁怨上干天和驅逼哨聚類致揭木要必
撼搖觀望禁諭有術號呼逃竄招撫有方僑寓寄食館
穀有備什億骸骸贍葬有道擲妻損子錄育有宜不願
復業許令附籍思返故鄉資給路費此皆仁人君子忠
厚存心亦弭盜睦隣之大義也

五議平糴古稱商賈之事可通於官府蓋握權奇時通
塞銖較而寸權之亦救荒權宜之一策也大都年凶穀
貴小民病之若發官廩減價出糴而四方巨僮販運穀
米一時輳集其價自平矣我朝周忱巡撫直隸初至
蘇松屬大饑穀貴忱廉得江浙湖廣大稔令人索金至
其地故抑其直勿糴且紿言吳中米價高甚用是三省
大賈販米數百艘集吳中忱乃下令盡發官廩貸民半
收其直城中米價驟減各賈進退兩難只得賤糴忱復
椎牛醢酒謝之各賈悉大歡而去米價既平乃復官糴
以實廩蓋昔耿壽昌之法穀賤增價而糴穀貴減價而
糴忱蓋祖其法而善用之者但減不可太減增不可過
增使不越原值庶官廩不竭而惠可繼矣然所以佐平

糴者又在無過糴俾商販諒我之公九道經我境者俱
運米而來又在無抑價俾商販聞風價直倍常自將輻
輳而至慎斯術也復何患米價不漸平而嗷嗷者不甦
之生哉

六議發倉夫近來令甲有司殿最在積穀多寡要知所
積之穀雖民所輸而非民之藏雖君所儲而非君之利
蓋專爲備荒計耳若歲荒穀價騰湧民嗷嗷待哺命在
旦夕司民牧者更不必拘泥待報之常期即宜發粟救
濟年終類報以 朝廷所蓄活 朝廷赤子誰曰不可
宋李允元通判寧州會歲饑發倉粟數萬賑之民得不
流徙 國朝夏元吉奉 命往撫三吳饑民奏發倉粟

三十餘萬石民賴以濟夏寅以吳中饑投書撫臺發廩
二十萬斛糴十萬石三吳賴以全活以上三公皆不拘
待報之常而發倉行賑可爲後世法者倘慮其散之易
歛之難必待報聞而後發則枵腹之民不爲溝中瘠者
鮮矣

七議倡義蓋富民國之衛也民之依也所謂藏富於民
者藏之此矣記曰富則仁義附焉夫好義之心人孰無
之要在上之人陽激而陰率之則倜儻之士將浮慕焉
而雖嗇夫亦捐千金如敝蕪矣宋程珦知沛縣會久雨
平原出水穀旣不登晚種不入珦計可耕而種時已過
矣乃募富室得豆數千石以貸民使布之水未盡涸而

甲巳露矣是年遂不艱食陳堯佐知壽州歲大饑公自出米爲糜以食饑者吏民遂爭出米活數萬人公曰以令率人不若身先而使其從之樂也趙閱道知趙州歲大歉公集富民誘以賑濟之義自解腰間金帶置庭下於是施者雲集全活十數萬人我朝何喬新奉命賑晉中請發內帑并准鹽銀數萬兩勸貸富室得粟數十萬石活三萬人招回復業者十四萬人附籍者六萬餘戶凡此皆以百姓之財救百姓之死倡導鼓舞之機惟豪傑默運之已耳

八議煮粥蓋凶荒人民流徙饑餒疾病扶老挈幼驅之不前緩之則斃資之錢幣則價湧而難糴散之菽粟則廩歎人衆而難遍惟煮粥庶可救燃眉宋程頤謂救饑者使之免死而已非欲其豐肥也當擇寬廣之處宿戒使辰入至巳則闔門不納午而後與之食申而出之日得一食則不死矣其力自能營一食者皆不來矣比之不擇而與者當活數倍之多也凡濟饑當分兩處擇羸弱者作稀粥早晚兩給勿使至飽俟氣稍完然後一給第一先營寬廣居處切不得令相枕籍作粥湏官自嘗恐生及入石灰也我朝萬曆十四年河南彰德府饑巡撫衷公議發賑餘米數千石及該府庫貯銀若干於豐穰處糴米隨在委官煮粥日一餐人給三碗明年復行開封等州縣如彰德所全活不可勝計大都煮粥雖

救荒下策然舉行固自有法蓋處之宜廣不宜隘舉之宜同不宜異令行宜嚴不宜寬食之口宜散不宜聚授之餐宜適不宜頻是在賢守令善行之而已

九議給粟蓋凶年行賑給之錢類費而鮮實舖之粥或聚而難散惟出公廩之餘藉富室之蓄計口給粟人不過升合家不過斗釜庶幾乎拯溺救焚之一策也昔趙抃知越州命吏錄老穉不能自食者二萬一千九百餘人故事歲廩窮人止三千石抃勸富人及僧道食羨者得粟四萬八千餘石自十月朔起人日受一升幼小者半之市郊各置給粟所共五十七處受粟者男女異地各以便受之且戒富人勿閉糴又出官粟五萬餘平其

價糴之爲糴粟所十有八處以便糴者又傭民修城爲工者三萬八千計工倍與粟棄男女者得收養之全活甚衆蘇次恭爲澧州開賑患劄記不公給印曆一本用紙半幅上自書家大人若干小兒若干合請米若干榜于門如虛首出甘罪又請米分幾人爲隊用旗引卯時一刻給第一隊二三刻及辰已如之即老幼婦女病弱悉得均糴萬曆十五年中州饑時襄巡撫貞吉至其地見河北諸郡及他省流寓者甚衆因命所司查勘每大口給粟二斗小口五升活二萬餘人願回籍者計程一給粟二升又移檄本郡邑計口賑之有地者量給種一時復業者三千餘口以上三公皆得給粟良法舉而行

之存乎其人而已

十議權宜蓋饑民嗷嗷待哺命在旦夕救荒如救焚非大豪傑權宜從事曷克有濟哉昔汲黯奉命按河內適見貧人傷水旱萬餘家至有父子相食者因以便宜矯詔開賑歸請伏罪武帝賢而釋之范仲淹守杭值歲大侵縱民競渡日張宴湖上自春至夏富民空巷出遊又詔僧修寺及新倉廩吏舍日役千夫監司劾其不恤荒嬉遊公乃條叙所以皆欲發有餘之財以惠無者是歲兩浙惟杭無流民范堯夫知慶州饑莩滿路官廩盡空公議發常平封樁粟麥濟之州邑欲俟奏請後發公曰人七日不食死可待報乎吾寧獨坐罪不累若等遂發

粟 國朝韓文綰南樞歲凶餓莩相枕籍公移咨戶部預支官軍三月俸糧度支以未得 命為辭公曰救荒如救焚民命在旦夕安能忍死以待耶即罪吾獨當之遂發米六千石以上四公皆能便宜從事有地方之責者倣其意而行之則蒼生幸甚

續文獻考卷之四十二終

續文獻考卷之四十二

